

PARLAMENTO HULANDES NO KIER ESTABLECE FECHA DI STATUS APARTE

DEN HAAG—Ayer Parlamento di Hulanda a debati ariba e cambianan cu mester keda introduci den Statuut di Reino marcando asina e introduccion di Status Aparte pa Aruba.

Segun informenan cu a drenta for di Hulanda, un mayoria den Parlamento Hulandes no ta sinti nada pa establecimiento di e fecha 1 di Januari 1986 como fecha pa Status Aparte di Aruba.

Den e proposicionnan pa ley cu ta necesario pa preparacion di e separacion di Aruba di e resto

di Abtillas, unicamente a wordo inclui cu e Status Aparte lo wordo determina pa Decreto di Reino. Mayoria di Parlamento Hulandes ta di acuerdo cu esaki, asina a sali na cla ayera durante e debate cu a tuma lugar den Parlamento di Hulanda, relaciona cu e futuro cambionan estatal.

CDA, VVD y D 66 ta di opinion cu mester tin e posibilidad pa laga Status Aparte di Aruba keda introduci na un fecha poco mas laat cu Promer di Januari di otro año, si no registra suficiente pro-

greso den e formacion di areglonan entre Aruba y Antillas, manera ta necesario pa e separacion di Aruba.

E partidonan ta haya cu na fin di año mester tene consulta pa analisa e progreso cu a keda registra y mira si e ta permiti introduccion di Status Aparte entrante Promer di Januari.

Wijnie Jabaay ta bisa cu Partij van de Arbeid ta parti for di e punto di vista cu Promer di Januari ta keda manteni como fecha pa Status Aparte, pero tampoco su partido a

bini cu un proposito pa determina esaki den un concepto di ley.

Cu e posicion Hulandes aki, segun informenan di Hulanda, e intento di Betico Croes pa determina e fecha di Promer di Januari, ta parce di no tin mucho chance.

Croes, durante e debate den Parlamento, a entrega un proposicion di tal indole. Parlamento di Hulanda ta bay di acuerdo cu un Status Aparte pa Aruba, pero sin mucho entusiasmo manera tur cos ta indica.

Asina Parlamento Hulandes ta haya cu cierto asuntunan cu mester keda regla entre Aruba y Antillas no ta bringa mucho claridad. Den e cuadro aki ta wordo papia di e wachtgeldregeling, cu ta pa ambtenaarnan cu ta bira excesivo, e separacion financiero di bienes, e cooperacion monetario y e posicion legal.

Na e Gabinete Hulandes a wordo pidi pa durante e debate di e siman aki duna mas tanto claridad posible encunto loke a keda acorda.

Parlamento Hulandes a bisa claramente

STATUS APARTE TA MARA NA INDENPENDENCIA NA 1996

Proposicion pa referendum no a cay den bon tera

ORANJESTAD(AAN)—Parlamento Hulandes ayera a muestra claramente cu e realizacion di Status Aparte ta irrevisiblemente mara na introduccion di Independencia na año 1996.

E vocero di VVD, Wiebinga, a bisa claramente cu independencia no ta un jojo, cu bo por pidi y despues cancela ora bo ta

haya ta bon. Independencia, segun e miembro di fraccion di VVD, no por wordo cambia pa Aruba unilateralmente mas.

Betico Croes a bisa Parlamento di Hulanda cu e ta na favor di un referendum na Aruba pa asina sondea e pensamiento encunto independencia. E resultado lo mester hunga un papel durante e

conferencia cu mester precedi e independencia.

Especialmente CDA y VVD a muestra cu nan no ta sinti nada pa un referendum. Tanto Wiebinga como Kwaadsteniet a

muestra cu e fecha pa independencia por wordo cambia solamente den cuadro di desaroyonan entre paisnan di Reino.

El a muestra cu esaki ta den luz di loke a keda

acorda na Mesa Redonda. Esey ta encera, segun e partidonan di Gobierno Hulandes, e posibilidad pa un reunion di Antillas, en vista di un independencia conjunto.

PDA CONTRA REDUCCION 15 PORCIENTO

ORANJESTAD(AAN)—Den un telegram cu Dr. Leonard Berlinski a manda pa Betico Croes, e ta trece dilanti cu na number di Partido Democratico Arubano, e ta protesta fuertemente contra e 15 por ciento cu e Gobierno Central di MEP a impone ariba comunidad Arubano.

Segun PDA, MEP atrobe a haci Curacao e smoke-screen pa tapa su mal manejo y ta laga su Gobierno Central tuma medidanan pa corta e garganta di nos Pueblo.

Berlinski ta sigui bisa cu asina e pueblo votador

por kere cu ta Curacao y no e culpable MEP cu a causa tur medidanan na Aruba.

E telegram ta sigui bisa cu ta gastonan manera awa corriente, gasolin, telefon, number di auto, a aumenta barbamente door di MEP cu ayudo di independentenan ariba lomba di nos Pueblo sin ningun esfuerzo pa baha gastonan di Gobernantenan. Tampoco a trata di baha e costo di bida di nos pueblo, manera PDA a trata di haci cu su viaje pa Colombia, Berlinski ta termina bisando.

LADRONNAN AWOR CU MASCARA Y ARMA

ORANJESTAD(AAN)—Diasabra madruga pa mas o menos 3.30 or un muher cu tabata den su negoshi na Pastoor Hendrikstraat, a yama polis bisando cu segun un yamada cu el a ricibi, tin dos homber mascara ta cana den su cas.

Un persona lo a yama e dama cu tin su vivienda

na Kustbatterij.

Ora e muher a bay su cas, el a ripara cu en verdad nan a saca 7 glas for di un bentana di baña pa pòr a drenta e cas.

Investigacion di polis a duna como resultado cu e ladronnan pa un o otro motibo, a topa cu un saco di placa cu un montante den dje. Aparentemente

nan a pone e placa un banda pero a lubide.

Tambe nan a lubida un revolver, cu a wordo haya pafor. Ta wordo calcula cu e ladronnan a wordo stroba den nan trabao, loke a haci cu nan mester a core sali for di e cas. Den e fuga e arma lo a cay.

E caso ta wordo investigando.

ANTILLAS TAMBE MESTER CUMINZA TRAHA Ariba SU INDEPENDENCIA

ORANJESTAD(AAN)—Durante e debate den Parlamento Hulandes pa introduci cambionan den Statuut, e vocero di CDA, Kwaadsteniet, na un forma

di advertencia serio, a bisa cu e eventual independencia di e Antillas di Cinco mester wordo discuti.

El a bini cu e sugerencia pa dentro di algun año

tene un conferencia di Mesa Redonda cu Antillas pa mira cual ta e posibilidadnan pa e islanan haya nan independencia total.

Sigui lesa pag. 4